



Informe di prensa 2018-023

Retiramentu for di sirkulashon di plakanan di papel 1986-1994

Willemstad – Banko Sentral di Kòrsou i Sint Maarten (CBCS) a disidí den konkordansia ku artíkulo 7, insiso 1 di e statuto di Banko Sentral di Kòrsou i Sint Maarten pa entrante 31 di yùli 2018 retirá for di sirkulashon tur denominashon di plakanan di papel di florin Antiano **di añanan di emishon 1986 te ku 1994**. Ta trata aki di e denominashon nan NAf 5, NAf 10, NAf 25, NAf 50, NAf 100 i NAf 250 di e seri di paranan **sin** e imprenta di foli koló di oro.

Komo konsekuensia di esaki, entrante 1 di ougùstùs 2018 **no** por usa plakanan di papel di e añanan di emishon mensioná mas komo medio legal di pago i ta permití entrante e fecha ei pa rechasá nan komo tal. Esaki ta enserá ku entrante e fecha ei, no por hasi pagonan kèsh mas ku e plakanan di papel ei.

E desishon pa retirá e plakanan di papel for di sirkulashon ta basá riba un evaluashon periódiko di plakanan di papel den sirkulashon. Na momentu di evaluashon ta wak prinsipalmente e kalidat di e plakanan di papel. E plakanan di papel di e seri 1986 no ta kumpli mas ku nos eksigensianan di kalidat.

Si akaso bo ta disponé di plakanan di papel di e añanan di emishon 1986-1994, nos ta supliká bo pa kambia nan sea na un banko komersial òf na CBCS. Entrante 1 di ougùstùs 2018 te ku 31 di yùli 2048 lo por kambia e plakanan di papel aki solamente na CBCS. Konforme artíkulo 7, insiso 3 di e statuto di Banko Sentral di Kòrsou i Sint Maarten e derechi pa demandá kambio di plakanan di papel ei ta kaduká despues di 31 di yùli 2048.

Willemstad, 1 di yùni 2018

CENTRALE BANK VAN CURAÇAO EN SINT MAARTEN